

Dithero tsa Tirelano mo Kutlwanong

05/2016 Thero ka moletlo wa go gopola botsalo jwa Morena, e le ka 25. 12. 2015

Mo leineng la Modimo o e leng Rara le Morwa le Mowa o o Boitshepo_

Lefoko le le okamelang moletlo o, le kwadilwe mo go Joh. 1:14a: **ALefoko leo la nna nama, la aga mo go rona, ra ba ra bona kgalalelo ya lone.**

1. Sefela sa 51 - 51/58

2. Thapelo: Modimo Mong-wa-thata-yotlhe , o re abele gore botsalo jwa ga Morwao yo o tsetsweng a le esi bo re golole mo botlhankeng jwa boleo ka ene Jesu Keresete, Morwao, Morena wa rona, yo o busang mmogo le wena le Mowa o o Boitshepo, o le Modimo o osi jaanong le ka bosakhutleng. Amen.

3. Lefoko la Testamente e kgologolo le kwadilwe mo go Miga 5:1-4a;

Epistolo ka fa thulaganyong ya 4 e kwadilwe mo go 1 Joh. 3:1-6;

Efangele ka fa thulaganyong ya 1 e kwadilwe mo go Luka 2:1-20.

4. A go ipolelwe tumelo ya bokeresete!

5. Sefela sa 369 - 341/348

6. Thapelo ya mmabi wa thero: Tla Mowa o o Boitshepo o re sedimosetse tlhaloganyo tsa rona, o tlatse dipelo tsa rona ka Lefoko la gago. O ipaakanyetse manno mo dipelong tsa rona. Amen.

7. Epistolo ka fa thulaganyong ya 2 e kwadilwe mo go Tito 3:4-7, e re: AMme e rile go bonala bopelontle jwa Modimo, Morepholosi, le go rata batho ga ona, wa re pholosa, e seng ka ntlha ya ditiro tsa tshiamo tse rona re di dirileng, mme e le ka fa boutlwelongo botlhoko jwa ona ka tlhapo ya go tsalwa gape le ka ntšhwafatso ya Mowa o o Boitshepo o o goromeditseng mo go rona ka Jesu Keresete, Morepholosi, gore e tle e re fa re sena go siamisiwa (ka go balelwa tshiamo ya ga Keresete ka go dumela mo go ene) ka bopelotlhomogi jwa ona, re nne baruaboswa ba botshelo jo bo sa khutleng jo re bo solofelang.@ Amen.

8. Thero: Phuthego e e rategang ya Morena wa rona Jesu Keresete, re letse re gopotse bosigo jo Morwa Modimo a tsetsweng ka jona. Re utlwile gore boutlwelobotlhoko jwa Modimo bo senotswe, fa Jesu a ne a tsalwa go nna lesea la mosimane. Bopelonomi jwa Modimo jwa direga ka go bonadiwa ka go nna motho gore a nne mo go rona ka sebele mmogo le bopelotlhomogi jwa Modimo le pholoso mo bathong botlhe ba merafe yotlhe.

Ka lefoko la thero ya kajeno re a gopodiwa, fa Lefoko le e neng e le Modimo go tswa mo tshimologong la nna nama, la nna motho ruri. Tseo re di abelwa mmogo le pholoso ka kolobetso. Kolobetso ya rona le botsalo jwa ga Jesu go nna motho di kopantswe tota.

Jesu Keresete yo o tsetsweng go nna motho, a amogelwa ka Mowa o o Boitshepo, gore a belegwe ke Maria go nna motho ruri, a dirafatsa gore re nne bana ba Modimo. Ga gatelelwa

tota gore go a tlhokega gore re pholoswe ke Jesu Keresete. Re tshwanetse go lemoga tseo ka metlha, fela jalo kajeno gore batho botlhe ba ne ba leswafaditswe mo go maswe ka go wa ga Atame le Efa ba ba wetseng mo boleong. Fela jalo tlhago ya rona e sa ntse e fifaditswe ka bofofu, le bosula jo bo maswe thata. Ga se ka ntlha ya tlhago ya rona gore re amogelwe ka bopelotlhomogi jwa Modimo, le bopelonomi jwa ona, le bontle jwa ona jo o re ratang ka jona gore re amogelwe ka tumelo, le go rutiwa, le go ipolela go nna bana ba Modimo.

Go na le ba bantsi ba ba ikayang batlhalefi, ba tshwaya ditlalelo tse di boitshegang tse re tshwenngwang ka tsona mo lefatsheng, ka go botsa gore lorato lwa Modimo lo ntse jang, le bopelonomi jwa ona bo kae? Gongwe kwa Egepeto, gongwe mo mafatsheng a mangwe kwa go bolawang teng mo go kalo, le go bogisiwa ka bodipa jo bo maswe, masula ao a utlwana jang le Modimo wa lorato? Ba batla karabo ya dipotso tseo mo Modimong. Modimo o na le karabo ya ona mo go tsona ka go direla batho molemo mo go kalo ka fa thatong ya ona. Wa re baakanyetsa botshelo. Matshwenyego a tlhaga fela mo bathong ba ba gopolang gore Modimo o na le maipofo go ba direla molemo ka fa ba ratang ka teng. Ba lebelela mo Modimong gore o ba romele moeteledi-pele yo ba ratang go mo sala morago le yo o ba direlang ka fa ba ratang ka teng. Gongwe ba batla moeteledi-pele mo tumelong yo o ba supetsang tse ba tshwanetseng go di dira ka fa ba ratang ka teng. Ke se ba se senkang mo go Akeresete@ wa bone. Ga ba tlhaloganye gore tse batho ba di dirang, le tse ba di ratang ga di lekane go didimatsa bogale jwa Modimo.

Matshwenyego ao ga a bonale mo go kalo mo gare ga ba e seng bakeresete, bogolo mo go ba e leng bakeresete. Jesu yo e leng Mopholosi wa rona o re golotse mo losong lo lo sa khutleng, le mo thateng ya ga Satane. Go tlhokega gore re itshwarelele mo go tse Paulo a di gatelelang, e bong mo mothaong wa go ipolela Efangle ka metlha e e reng: AMme e rile go bonala bopelontle jwa Modimo, Morepholosi, le go rata batho ga ona, wa re pholosa, e seng ka ntlha ya ditiro tsa tshiamo tse rona re di dirileng, mme e le ka fa boutlhwelongbothoko jwa ona;@ e seng mo godimo ga mothao wa ditiro tse re di dirang, gongwe tse re di dirileng, gongwe tse re tla di dirang. Go gateletswe mo go kalo mo lefokong, le fa go le jalo go sa ntse go na le ba ba tona, le ba namagadi le fa gare ga badumedi ba ba gopolang ngwana wa kwa Betleheme, le Mopholosi mo sefapaanong, le tsotlhe tse di rutiwang mo Kategisimeng, ba sa di ikanye, mme ba sa ntse ba itsietsa ka go ikanya maitsholo a bone le dikatlholo tsa bona gongwe dithapelo tsa bone ba re: Ba ipaakanyetsa ka tse di ntseng jalo manno a a botoka mo legodimong. Ke tse re ka itsietsang ka tsona, fa re latela tsa tlhago ya rona.

Tse di ntseng jalo, di ata mo go maswe le mo dikerekeng tse dintsi kajeno. Go godisiwa diteko tsa go rekisa tsa ditumelo mo boemong jwa go ruta lefoko la molao le Efangele ka go ikanya gore diteko tseo di tla baakanya tse di tshwenyang mo diphuthegong, badumedi ba timediswa

ka go ikanya tse di baakanngwang ke bona mo boemong jwa go ikanya thuso e e tswang mo Motlhoding le mo Mopholosing wa rona. Mo dikgwebong moreki o na le thata ka metlha. Barekisi ga ba leke go fetola megopolo le thato ya moreki, o mo naya se a se ratang. Ka botlhale o baya tse dintsi fa pele ga moreki gore a ikgethele tse a di batlang . Mokgwa o o ntseng jalo o bonala mo dikerekeng tse dintsi kajeno. ABareki@ ba ipatlalela kereke e e ba itumedisang, e e ba nayang moratiso o o ba ngokang ka fa dikeletsong tsa bone. Ba bantsi ba tshegetsatshe theologi e e ntseng jalo. Ba itshola ka go gopola gore motho o fa gare ga bosula le Modimo, o tshwanetse go ikgethela kwa a ratang go ya teng. Go botlhofo go boela mo kगतimping ya go itsietsa e e ntseng jalo.

Mo ditemaneng tse di latolang lefoko la thero ya kajeno Paulo o latlha ditsietso tse di ntseng jalo, a re: AGonne le rona re kile ra bo re le bosilo, re sa utlwe, re timetse, re direla dikeletso le dikgatlhago dingwe le dingwe, re tshela ka bosula le ka lefufa, re ilega, re tlhoanye,@ Tito 3:3. Ka mafoko ao ga go buiwe ka ga motho yo o nonofileng go itlhaolela tse a di ratang. Ke motlhanka yo o mo thateng ya yo o golegang mo go maswe, gongwe ya motimetsi yo o maswe yo o timetsang. Ka tsa motho yo o sa dumeleng tse di ntseng jalo. Paulo o gatelela mo mafelong a le mantsi gore ke batlhanka ba dikeletso tsa bone le ba tse di ba itumedisang ka fa thatong e e bosula jwa bone. Ba a timediwa, ba sokomiswa ba sa kgone go ithusa ka sepe, ba gogelwa koo le koo ka tse di ba timetsang, le go ba sokomisa. Fela jalo tsotlhe tse di kopantswe ka go golegwa di raya le dikeletso tsotlhe tsa mefutafuta tse di lebaganyeng le tsa dithuto tsa tumelo tse di sa utlwaneng, tse di ganetsang bopelotlhomogi jwa Modimo jo bo senotsweng ke ene Jesu.

Ga re pholoswe ka bopelotlhomogi jo bo tshwayiwang ka tlhaloganyo ya botho. Re pholoswa ka bopelotlhomogi jo bo tshwayiwang ka fa tlhalosong ya bokeresete, jo bo emalalanang gantsi le kemo ya boitiredi jwa merafe. Bopelotlhomogi jwa Modimo bo senotswe ka mafoko a a reng: Modimo o re pholosa Aka fa boutlhwelongbotlhoko jwa ona ka tlhapo ya go tsalwa gape le ka ntšhwafatso ya Mowa o o Boitshepo o o goromeditseng mo go rona ka Jesu Keresete, Morepholosi.@ Botsalo jo bošwa le go ntšhwafadiwa gore re nne bašwa, go diragala mo kolobetsong.

Kolbetso ka metsi mo leineng le Modimo o e leng Rara, le Morwa, le Mowa o o Boitshepo ke tlhapo ya go ntšhwafadiwa go nna bašwa. Ga se metsi a a tshedisang fela, mme gape ke metsi a a bolokang botshelo, a a tlhapisang, le go itshekisa selabe sa lepero la boleo, sa tsotlhe tsa boaka, kgokafalo, dikeletso, bogale, tlhophololo, bogagaru,, ditshebo, maaka, tsotlhe tse di tswang mo pelong ya rona ka fa tlhagong. Tsotlhe tseo di itshekiswa, le go tlhapiswa mo metsing a bopelotlhomogi jwa Modimo. Ke botsalo jo bošwa jwa mo

legodimong. Ga se botsalo jo bošwa jwa nama, gongwe jwa thato ya nama, mme ke go tsalwa sešwa ke Modimo, gongwe ka fa thatong ya ona. Mo kolobetsong Mowa o o Boitshepo o kala sešwa ga bodiba jwa metsi jaaka mo tshimologong, fa Modimo o tlhodile legodimo le lefatshe le dibopiwa tsotlhe. Mo kolobetsong Modimo o bua gape lefoko le e leng lefoko le le tlholang. Go dragala se sešwa. Re tlholwa go nna dibopiwa tse dintšhwa mo kolobetsong gore re nne ba ba tsetsweng ka metsi le ka Mowa ka lefoko la Modimo. Aka moo he, fa motho a le mo go Keresete, o a bo a le sebopiwa se sešwa; dilo tsa bogologolo di fetile, bonang, di ntšhwafetse tsotlhe.!

2 Bakor. 5:17. Ka moo go ne go tshwantshitswe bogologolo ditshwantsho tse di supileng tlholego ya lefatshe mo tshimong ya kwa Etene, le ya ditshedi mo dibotaneng gaufi le kwa go kolobediwang teng mo kerekeng. Ka moo mo kerekeng ya bogologolo batho ba ne ba kolobediwa ba sa ikatega, ntle le dikgabiso. Kolobetso ke parateise e e tshegofaditsweng ka loso le tsogo ya ga Jesu. Tsa bogologolo di fetile. Go tlhagile se sešwa fela. Batho ba letlane gape le Modimo o o mo legodimong, le bontle jwa legodimo jo bo fetang bosweu jo bo ka tlhagang ka diteko tsa motho tsa go dira se se phatsimang. Kobo ya tshiamo ya ga Keresete e re e apesitsweng mo kolobetsong e phatsima ka ntlha ya tiro e re e diretsweng ka madi a ga Keresete, jaaka go kwadilwe mo Tshen. 7:14 gore bona Ake ba ba tswang mo pitlaganong e kgolo, ba tlhatswitse diaparo tsa bone, ba di sweufaditse mo mading a Kwana.

Kolobetso ke metsi a a kopantsweng le taolo ya lefoko la ga Keresete. Jesu o tlhomile kolobetso, a laola ka metsi ao gore e nne kolobetso ya gagwe, ga e a tlhongwa, e seng ke kereke, le e seng ke phuthego, gongwe ke motho. Kereke e utlwa taolo ya ga Keresete, fa e kolobetsa, gongwe fa e ruta lefoko la ga Jesu. Ke yona neo ya kereke le boemo jwa go disa phuthego gore go diragale. Ke yona tsela e barutwa ba ga Keresete ba dirileng ka yona. Jesu ga a re supetse tsela e nngwe go dira tiro ya go dira merafe go nna badumedi ba gagwe, fa e se ka go kolobetsa batho mo leineng la Modimo o e leng Rara le Morwa le Mowa o o Boitshepo, le ka go ba ruta le go boloka tse Jesu a di ba laetseng.

Taolo e ya ga Jesu go dira barutwa ba gagwe e kopantswe le metsi go tlhoma, le go tiisa tiro ya gagwe. Ka tiro eo Jesu o a re felegetsa, ka yona o nna mo go rona. O tshegetsa tiro ya gagwe. O a re solofetsa go nna le rona mo go yona. Le fa re bona seatla sa moruti se a tshelang metsi ka sona, tota-tota ke seatla sa Modimo se se dirang teng. Le fa re utlwa lentswe la moruti, tota-tota ke lentswe la Modimo, fa a rera, a ruta se Jesu a se rutileng. Kolobetso ke tiro ya Modimo, ga se ya rona. Ka yona re amogela dimpho tsa Modimo. Ke Modimo o o re abelang dimpho tsa ona ka lefoko la Efangele e e rerwang, le ka disakaramente. Fa lefatshe le ka batla go itse mo go rona gore re kolobeletsang, re ba araba fela, re re: Morena o re laola gore go kolobediwe. Fa le botsa gore re kolobeletsang bana? Re araba, re re: Morena o rata gore botlhe ba dirwe barutwa ba gagwe ka go kolobediwa. Re

gatelelang ka go ruta gore kolobetso e tlhokegile mo pholosong Re a araba, re re: Morena o rialo. Morena o laola jalo.. Ke kolobetso wa gagwe. Rona re badiredi ba gagwe mo kolobetsong. Gape go kwadilwe ka thanolo e kgolo gore batho botlhe ba tsalwa e le baleofi. Jesu a re: A Fa motho a sa tsalwe ka metsi le ka Mowa, ga a ka ke a tsena mo pusong ya Modimo. @ Ka go tsalwa sešwa jalo mo kolobetsong motho, le fa e le yo mogolo, le e le yo monnye o kopanngwa le Mogolodi yo re mo tsaletsweng ke Maia kwa Bethlehem, yo e leng Morena mo motseng wa ga Dafita. Ke se se dirang gore re bue mo go kalo ka ga kolobetso ka moletlo wa go gopola botsalo jwa ga Jesu Keresete

Ka bopelotlhomogi jo jwa Modimo re a pholosiwa. Pholoso ke go gololwa mo botlhankeng jwa boleo, jwa loso, le mo thateng ya ga Satane.. Ka go pholosiwa re ntshiwa ka kolobetso mo kgolegelong go amogelwa mo bontleng jwa puso ya Modimo mo leseding le lentle. Ka kolobetso re fiwa manno go hema sentle, le go dira, le go rapela, le go boka, le bo leboga Modimo wa rona, le go direla ba bangwe. Pholoso ke go gololwa mo maleong, mo losong le mo thateng ya ga Satane, le go tsena mo pusong ya ga Keresete go nna mo go ene, go ya bosenangbokhutlo. E rile Baegepeto ba nwela mo lewatleng, Baiseraele ba ne ba gololwa mo botlhankeng jwa bone, rona re gololwa ka kolobetso go gololelwa go nna bana ba Modimo, le go tshelela bogosi jwa ona, le tshiamo e e se nang bokhutlo, le kgalalelo e e sa feteng.

Ke jona bontle, bopelonomi, le lorato lo Modimo o ratang ka lona go re baakanyetsa pholoso e e s khutleng, ka e le Mopholosi wa rona, le go re goromeletsa Mowa o o Boitshepo mo godimo ga rona mo kolobetsong e re e tlhomamiseditsweng ke Keresete yo re mo tsaletsweng kwa Bethlehem. A o lemoga, fa o humisitswe mo go kalo?

Tsotlhe tseo di tiisitswe, di solofeditswe ka lefoko le le ikanyegileng, e le lefoko le le tswang mo Moreneng. Ga le tswe mo mothong. Ka moo Paulo o a gatelela mo go kalo tsotlhe tse re di utlwileng. Ka moo re di gatelela fela jalo. O amogetse mpho e ya Modimo gape kajeno mo moletlong o montle. Ga o nke o khutla go bona tsotlhe tse di tshwaragantsweng le pholoso e re e filweng ka tsholofetso ya boitumelo jo bo tla nnang jwa batho botlhe, jo bo itsisitsweng ke moengele mo bosigong jole mo badiseng kwa Bethlehem. A tlotlo e nne mo Modimong o e leng Rara, le Morwa le Mowa o o Boitshepo! Amen.

9. Thapelo: A bopelotlhomogi jwa Morena Jesu Keresete, le lorato lwa Modimo, le kabelano ya Mowa o o Boitshepo di nne le lona lotlhe. Amen. Thapelo ya Morena: Rara wa rona yo o mo legodimong ...

10. Sefela sa 52 - 52/60

A kagiso ya Modimo e e fetang tlhaloganyo yotlhe e boloke dipelo tsa rona le maikutlo a rona mo go Keresete Jesu, Morena, Morepholosi. Amen. Thero eno e kwadilwe ke ,K. H. Schnackenberg ka

ngwaga wa 2015 Kgatiso le go rongwa ga dithero tseo go tshegediwa ke kopano e e bidiwang The Lutheran Heritage Foundation.

